

LI MANITOBA MAAMOO ATOOSHKAYWIN KISHINAHAMAAKAYWIN POOR LI PRAMYII MOOND CHI PIMITSHAHAMIHK POOR LII UNIVERSITIES, LII KOLLAYZH PI LII PUBLIC SCHOOL BOARDS:

Chi niikaan ooshihtaahk chi miyoopayihk iita ka kishinahamaakayk pi kishchi poor li praamyii moond

Niiyanaan, lii University, lii Kollayzh pi lii zikol daan li publik ka pishkapahtahkik, ni moochikanihtaanaan kaa miyeupayihk, miina kaa miikooyahkoohk lii zaanfaan dikol atokton pi aniki ka kishinahamwaachik paytaawuk kaa dawayhtamihk daan lii groos ikol miina chi naashkoopitamihk kaa lii Atokton kaa kishkayhtuhkik tapishkoot kayaash ka kii pimitshahamihk. Ooma chi wiichihiwayhk chi niikaaniihk nawut kwaayesh chi kishkayhtamihk daan li Manitoba.

Ni kishkayhtaynaan kaykwy kishchi ka kii miikawiiyaahk niiyanaan lii Michif, lii Praamyayr Naasyoon, pi lii Inuit pi nutr zaanfaan d'ikol, pimatshiwinn, taanday ooshchiyahk, nutr zistwayr, nutr laang, aen ishi nakatwayshchikooshiyahk, kayaash ka pimitshahamahk aen ishi paashpiiyahk pi miina aen ish mooshihtaayahk. Maarsii ditaananik aen kii wiichihiwaychik lii Naasyoon Anishinabeg, Niihiyow, Ojibway-Niihiyow, Dene, Dakota, Inuit pi lii Michif.

Ni nistawaymaanik ka ishi waakoohtookh daan lii traytii avik lii Zatokton pi lii zootr naasyoon kaa ishi nishitoohamihk daan la koonstitutusyon di Canada, avik lii drway, lii papyii kaa ooshchiminamihk pi lii traytii. Kayaash kaaya kwaayesh ka maachipayihk nishtum kiipyapit namooya ki kanawapamitoonaan miina namooya ki nishitoohaynaan akooshchi kiipyapit ka mooshihtaayahk anoosh daan li Canada.

Ki kishkayhtaynaan kiiyaanaan ka kishinaamakayyahk taanishi chi wiichihiwayyahk pi miina taanishi chi kishinahamwayahkook aniki ka niikaaniichik, chi wihtamakayhk lii drway poor l'aydukaasyoon poor lii Zatokton, avik li Goovaarnimaan ka pamihaat li moond Atokton.

Ni taapwayhtaynaan pi ni wiichihiwaanaan kwaayesh chi kanawaapamitoohk aantor lii Zatokton pi lii zootr naasyoon daan li Manitoba kwaayesh chi mamoo atooshkayhk pi chi oohpitamihk pi chi kanawayhtaamihk. Ooma kishchi ka wiichihikoonaan chi kishchiitaymitoohk pi miina chi shoohkahk kwaayesh chi nishitoohataatoyahk. Ooma sapraan chi shoohkaahk kiishpin kwaayesh kaahkiyow chi mamoo otooshkayhk chi kishkaymitoohk aantor naasyoon iita ka wiikihk. Ooma kaaya chi waaniihkayhk ka kii ooshipayhamihk lii deu di Jwaen, deu mil kaynz avik Truth and Reconciliation Commission of Canada Calls to Action.

AANIKA KAA LISINIICHIK AASHOOTAMWUK CHI:

1. Aen wiitotooshkaymayahkook avik lii Atokton daan li rispay aantr lii deu naasyoon, kwaayesh chi pimoohaymakaahk chi tipaymishoohk pi chi niikaaniishtamaashoohk chi kiikayhk. Chi oohpinamihk nutr laang pi ka ishi pimatishiyahk daan li edukaasyoon, chi natoonamihk pi taanishi ayiwaahk chi kishkayhtamihk.
2. Aansaamb chi aashtayahk ka kishkayhtamihk kaayaash ka pamatishiyahk, nutr laang, aen ish naakatwayhtamihk, avik kishinamaakaywin, pi la vii du moond.
3. Chi atooshkaatamihk chi mishkamihk pi chi kishkayhtamihk aen achikahtayhki lii zistwayr pi taanishi ooma anoosh ka ishpaayihk daan la vii dii Atokton.
4. Chi kaashkihtaak chi ootinamihk lii saarvis, lii prograam pi chi wiichihishchik lii zaanfaan d'kol Atokton, chi aashtayk enn plaas chi kishkayhtamihk iita aen waapahtaywayhk mitooni chi kaashkihtaahk.
5. Chi mamoo atooshkatamihk kwaayesh lii zaanfaan d'kol chi mishkakhik wiishtawow chi miyeu pamihachik leu zaasaasyii Atokton.
6. Chi oohpinamihk enn plaas daan l'kol pi iita ka wiikihk poor nawut chi pamiihiwayhk, miina chi nishitoohamihk, aykaa chi kooshtamihk taanishi aen pimitshahamihk pimaatishiwinn pi ayka chi mooshihtahk pi chi paashpiihk aen matawaatikawiyen.
7. Nawut mishchayt pi miina chi naashchooshchikayhk daan lii z'ikol Atokton pi lii graan z'ikol chii itoohayhk pi kwaayesh chi kaashkihtahk.
8. Chi waapahtaywayhk kwaayesh aen kaashkihtahk paarmii lii zaanfaan d'kol Atokton pi aniki ka kishinahamaakaychik.
9. Kwaayesh chi kishkayhtamihk taanishi aen ishi pakkaan pimatishichik lii Praamyayr Naasyoon, lii Inuit pi lii Michif daan li Manitoba paarmii li goovaarnimaan di z'ikol, aniki atooshkaatahkihk lii lway d'ooovraazh pi taanishi aen ishi koochistahk.
10. Chi wihtamoowayahkook taanishi li goovaarnimaan, miina piko awiiyuk pi miina aniki ka payyako atooshkaychik chi ooshihtaachik la shaans poor lii zaanfaan d'kol ka pooyoochik.

Mashinamuuk leu noon sur li papyii aen wii pimitshahahkik. It aka kishinahamaakayhk neu pimitshahaynaan aansaamb chi ooshihtahk, chi aashtayk pi chi kanawaapahtamihk lii lway, chi pimoohaymakahk iita ka kishinahamakayhk pi miina iita ka wiikihk chi oohpinamihk laydukaasyoon poor lii Zatokton pi chi miyeu kanawaapahtookh. Ohiin chi kiishihtahk daan saenk aan poor laydukaasyoon di Manitoba poor lii Atokton aansaamb chi atooshkayhk poor lii graan plaan chi piihtikwaataahk aan deu mil sayz.



Mr. Mark Frison, *President*
Assiniboine Community College




Mr. Ken Cameron, *President*
Manitoba School Boards Association



Dr. David T. Barnard, *President and Vice-Chancellor*
University of Manitoba



Dr. Gervan Fearon, *President and Vice-Chancellor*
Brandon University



Mr. Paul Vogt, *President and CEO*
Red River College



Dr. Annette Trimbee, *President and Vice-Chancellor*
University of Winnipeg




Dr. Cheryl Pauls, *President*
Canadian Mennonite University



Dr. Gabor Csepregi, *President*
Université de Saint-Boniface



Mr. Paul Holden, *President and CEO*
Manitoba Institute of Trades and Technology



Mr. Konrad Jonasson, *President and Vice-Chancellor*
University College of the North